

摘藻堂四庫全書薈要

集部

欽定四庫全書薈要

集部

漢魏六朝百三家集卷一百三下



詳校官候選知縣臣吳甸華

欽定四庫全書薈要卷一萬九千六百九十六集部

漢魏六朝百三家集卷一百三下

明 張溥 輯

陸陵集
書

薦陸瓊書

新安王文學陸瓊見識優敏文史足用進居郎署歲月
過淹左西掾缺允膺茲選階次小踰其屈滯已積

報尹義尚書

別離二國雲雨十年心想河陽言銅爵而無遠神游漳水
與金鳳而俱蜚北使還辱去冬十月十一日告忽同言叙
循環巧制欣慰良深河朔年芳雖當淹晚白溝澆澆春流
已清紫陌依依長楊稍合體中何如豈無鄉思弟三秦世
胄六輔良家文武兼能志懷開遠谷永之筆無慙古人益
延之功高視前彥而淹留趙魏亟歷寒暄企望鄉關理多
悲切聖朝欽明纂歷大拯生民戮巨海之奔鯨殲中原之

封豕晉君之說長安遠於日邊揚雄有言交州在於天際
則輸縣王府屈膝閭門川洞酋豪彊梁溟海神兵一指率
土咸康方當偃伯於靈臺韜戈於武庫變大風於五禮驅
蒸民於昌辰物色英聲搜揚俊傑投竿負鼎馳步蒼龍巖
穴丘園爭趨金馬而弟留河北義等周邵懷此殊才實可
傷嗟吾崦嵫既暮容鬢皤然風氣彌留砭藥無補追惟疇
昔共備行人室家安危賓禮升降懸壺代哭俱歷春冬移
館於箕同茲辛苦鳴蜩抱樹亟見藏冰歸鴈銜蘆多經寒

食靖言念此如何可忘翫來書彌其承臉夫以擁腫之
木得免因於不才殼棘之牛自保由其無用以余鄙陋未
友龔生惟歎吾賢不同蘧瑗耳若推溝拯溺每切皇衷逸
翮飄鱗見優機檻所以降尺一之書馳輶軒之使心期與
國必遂還途寧謂親隣更成難請言尋雅告所及縲囚便
訪鴻臚幸無淹使聞諸司寇或有邊俘前歲中流是維同
惡燕禽望關冀馬臨江裁頓雲羅自投天網京觀之塚
宜彰武功周醜之門方申明罰而聖朝好生惡殺收雷

寢電兵車所獲雖同長萬之來恩澤從容無異荀瑩之
禮方之於弟况擬非倫伊昔梁朝共奉嘉聘張茲大帛
處彼高閣庭奏歌鐘座延僑肸賓客之叙方於阼階田
獵之禽同於君膳正以鄉關阻亂致爾拘留家國隆平
義應旋反况復韓宣屢至宰孔頻還翻爾遲迴豈云隣
睦弟遂鍾儀之操對此皇華高厚之詩一何非類闕徐
庶樂之况三戰七禽之言此日借子之矛攻子之室彼
之使客猶尚不還此於齊都豪門貴戚周行匪例事義

相懸豈與大弟同年而語吾本自凡流以復衰老稍近

東岱不奢擊壤之年惟欣堯俗若耶之復長保安卧時

思之

此若耶至此闕誤

不棄忝亞宗卿非得侵官天辰但當今凡

芄在詠濟濟盈朝才冠卿雲智同荀郭文辭富於江海

高論泊於雲霄趨走丹墀之門侍奉清規之內弟來欵

言至欲附所聞駢類非宜更其多惑若使良有

闕二字

猶

希贈鯉之書郵驛方通復行蜚鶴之信執筆潛然不知

何向

與李邕書

籍甚清徽常懷虛眷山川緬邈河渭像於經星顧望風
流長安遠於朝日青萋戒節白露為霜君子惟宜福履
多豫雍容廊廟獻納便繁留使催書駐馬成掇車騎將
軍賓客盈座丞相長史瞻對有勞脫惠箋繒慰其翹想
吾栖遲茂陵之下卧病漳水之濱迫以崦嵫難為砭藥
平生壯意竊愛篇章忽覩高文載懷勞佇此後殷儀同
至止王人授館用阻班荆常在公筵敬析名作獲殷公

所借陪駕終南入重陽閣詩及荊州大乘寺宜陽石像
碑四首鏗鏘並奏能驚趙鞅之魂輝煥相華時瞬安豐
之眼山澤晄霽松竹參差若見三峻之峰依然四皓之
廟甘泉鹵簿盡在清文扶風輦路悉陳華簡昔魏武虛
帳韓王故臺自古文人皆為詞賦未有登茲舊閣歎此
幽宮標句清新發言哀斷豈止悲聞帝瑟泣望羊碑一
詠歌梁之言便掩盈懷之淚至如披文相質意致縱橫
才壯風雲義深淵海方今二乘斯悟同免化城六道知

歸皆踰火宅宜陽之作特會幽衿所覩黃絹之詞彌懷
白雲之頌但恨耆闍遠嶽擅特高峰開士羅浮康公懸
溜不獲銘茲雅頌耀彼幽巖循環省覽用忘饑渴握之
不置恒如趙璧翫之不足同於玉枕京師長者好事才
人爭造蓬門請觀高製軒車滿路如看太學之碑街巷
相填無異華陰之市但豐城兩劍尚不俱來韓子雙環
必希皆見莫以好龍無別木鴈可唾載望瓊瑤因乏行
李金風已勁玉質宜調書不盡言但聞文繫徐陵頓首

與顧記室書

吾伏事天朝本非舊隸殿下殊恩遠垂薦拔故常戰戰慄慄甘心痛謹庶其愚老無負明據近者既居臺轄唯務奉公去年正月十五日尚書官大朝元凱既集丞郎肅然忽有陳慶之兒陳暄者帽簪釘額條布裹頭虜袍通蹠胡靴至膝直來郎座遍相排抱或坐或立且歌且詠吾即呼舍吏責列不答而走反為憾恚妄相陷辱至六月初遂作盲書便見誣謗聖朝明鑒悉知虛罔唯云

吾取徐樞為臺郎南司檢問了不窮推承訓劾為信言
致成隳免此事冤枉天下所無吾市徐樞宅為錢四萬任
人市估文券歷然不蒙申理見枉虛巧二者樞是故少
府卿鱗之子鱗殞身候景之役又為西臺所贈兗州左
衛官位甚高未知其子何忝郎署魏晉之前如為久遠
宋齊以降其例甚多如徐愛阮佃夫之子可不得郎官
耶紀文卿公向璉皆為列棘豈冗雜曹郎乎三者樞入
身梁朝解褐岳陽王小府墨曹承聖時為故敬帝晉安

王諷席文墨具存陝西官爵乃多浮濫更補臺郎不為
勝擢未知何忽推宅貨官四者徐領軍節度自啟樞為
郎勅付選序吾既不啟據又不為選職所可相關止是
得中候相聞為呈啟而已以此見罪一何寃濫吾昔在
承華是弟所悉行年六十無復儕儔非意餘生忽此誣
謗堯有驚於讒說孔將惑於拾塵雖復聖主機明不能
悉照殿下德高兩獻風美二南億兆歸心衣冠有托久
願通啟披訴聖明伏見軍戎多務所以不敢祈冒弟與

吾遊眷亟迴星紀故人如此寧不矜歎耶侍言有便云
何且為啟聞一蒙神鑒照其枉真方歿幽泉無恨灰壤
伏覲謁帝承明緒言多次服矜遺老曲賜滫濯則殿下
前時妄澤匪復偏私遂吳良延薦之恩無王丹所舉之
謬吾得方辭武騎永附梁賓雖媿家丞庶呈秋實緣弟
深眷故此敬憑干謁非宜益懷悚慨徐陵白

答族人梁東海太守長孺書

其人梁未
入北齊

恩報近歲奉使來歸辱彼河清年中告行并惠以明鏡

亟離寒暑雖復時陳梁鶴日照孫鸞言慰相思反增離
眷劉傳三常侍還又承書札銀鈎甚麗玉疏依然開封
伸紙破愁為笑素秋方屆溽暑稍闌體中何如善保元
吉藪臺之璧少海之珠何必鄉里所在為貴卿託身大
國既已積年彼朝英彥理相欽挹方當交辟三命清宦
兩宮何乃濶然遲有問也吾七十之歲崦嵫已迫朽老
之疾隨年而甚徒懷北邙之切未遂東都之期牽役承
閒但有哀頊賢從君政佐佑興基中舍誌殿中並休宜

自別有書問來告訪吾文章吾自歸來鄉國亟徙炎涼
牽課疲朽不無辭製而應物隨時未曾編錄既承今告
輒復搜檢行人相繼別簡知音但既乏新聲全同古樂
正恐多慙於協律致睡於文侯耳燕南趙北地角天涯
言接末由但以潛歆善敬德中郎並比境之良選皇華
之上求若可輜軒別當委白君問

諫仁山溪法師罷道書

竊聞出家閒曠猶若虛空在俗籠樊比於牢獄非但經

有明文亦自世間共見暫聞法師覆彼舟航趣返緇衣
之務此為目下之英竒非久長之深計何以知然從苦
入樂未知樂中之樂從樂入苦方知苦中之苦弟子素
與法師雖無曩舊相知已來亦復不疎夫良藥必自無
甘忠諫者決乎逆耳倚見其僻是以不忍不言且三十
年中造莫大之業如何一旦拾已成之功深為可惜敬
度高懷未解深意將非帷帳之策欲集劉侯形類卧龍
擬求葛氏黃石兵法寧可再逢三併茅廬無由兩遇封

爵五等惟見不逢中閤外門難朱易白鳴笳鳳管非有
或聞儻女歌姬室勞反翫覓之者等若牛毛得之者譬
猶牛角以此之外何所窺窬法師今若退轉未必有一
稱心交失現前十種大利何者佛法不簡細流入者則
尊歸依則貴上不朝天子下不讓諸侯獨翫世間無為
自在其利一也身無執作之勞口餐香積之飯心不妻
妾之務身飾芻摩之衣朝無踐境之憂夕不千里之苦
俯仰優游寧不樂哉其利二也躬無任重居必方域白

壁朱門理然致敬夜琴晝瑟是自娛懷曉筆暮詩論情
頓足其利三也假使棘生王路橋化長溝巷吏門兒何
因仰喚寸絹不輸官庫升米不進公倉庫部倉司豈須
求及其利四也門前擾擾我且安眠巷裏云云余無驚
色家休小大之調門停強弱之丁入出隨心往還自在
其利五也出家無當之僧猶勝在俗之士假使心存殺
戮手無斷命之愆密裏通情決勝灼然矯俗如斯煩垢
萬倍勝於白衣一入愛河永沈無出其利六也聽鐘聲

而致敬尋香馥以生心朝覩尊儀暮披寶軸刹那之善
遂此而生水滴微功漸盈大器未知因緣果報善惡皎
然就此而言其利難陳矣假使達相白衣猶有埃塵之
務縱令遙寄彈指遠近低頭形去心留身移意往間有
者得如此貧苦者永無因近在目前不言可見其利七
也山間樹下故自難期枕石漱流實為希有猶斯之類
不可思議如此者難逢一心人怖遇法師未能不學交
習聽勝之因一旦退心於理邀矣其利八也開織成之

帙見過去之因。攜琉璃之卷。驗當來之果。識因識果。不以為愆。知福知報。何由作罪。上無舟楫。交見沒溺之悲。下失浮囊。則有沈身之患。其利九也。曠濟羣品。為天人。之師。水陸空行。皆所尊貴。言必闍黎。和尚書。輒致敬。和尚。遠近嗟咏。貴賤顯仰。法師今必退轉。立成可驗。纔脫袈裟。逢人輒稱汝我。始解偏袒。姓名便亦可呼。平交者。故自不論下劣者。亦恐不讓。薄言稱已。榻席懸異。從來小得自在。便以君為題封。若不屈膝。斂手。自達無因。俯

仰承迎未闕合度如此專專何由可與其利十也略言
十事空失此機其間深道寧容具迷仰度仁者心居魔
境為魔所迷意附邪途受邪易性假使眉如細柳何足
關懷頰似紅桃詎能長久同衾分枕猶有長信之悲坐
卧忘時不免秋胡之怨洛川神女尚復不惑東阿世上
班姬何關君事夫心者面焉若論繾綣則共氣共心一
遇纏綿則連宵厭起法師未通返照安悟賣花未得他
心那知彼意嗚呼桂樹遂為豆火所焚可惜明珠乃受

淤泥埋沒弟子今日橫語必為法師所哂世上白衣何
訾何限且一人退道而不安危推此而言實成難解譬
如瓦礫盈路人所不驚片子黃金萬夫息步正言法師
入道之功已備染俗之法未加何異金搏赤銅銀換鉛
錫可悲可惜猶可優量能忍難忍方知其最願棄俗事
務息塵勞正念相應行志兩全薄加詳慮更可思惟悔
之在前無勞後恨如弟子算遠即十數年中決知惻惻
近即三五歲內空唱如何萬恨萬悲寧知遠及自誤自

錯永棄一生乃知斷絃可續情去難留或若火裏生花
可稱希有迷人知返去道不遙幸速推排急登正路法
師非是無智遂為愚者所迷類似阿難更為魔之所繞
猶須承三寶之力制彼羣凶豎船若之幢天魔自寂若
此言旨當即便冀棄芻蕘若不會高懷幸停深怪耳

與智顛書

陵和南昨預沈儀同法席餐奉甘露無畏之吼衆咸歸
伏然正法炬朗諸未悟自慶餘年得逢妙說尋事諮展

此不申心謹和南

又

陵和南注仰之心難可數具拔公至蒙三月二十日肯
用慰積歲傾心夢冷體中何如願一日康勝山中春夏
無餘障惱耳遲復存旨弟子二三年來溘然老至眼耳
聾闇心氣昏塞故非復在人兼去歲第六兒天喪痛苦
成疾由未除愈適今月中又有哀故頻歲如此窮慮轉
深自念餘生無復能幾無由禮接係仰何言敬重瑛公

今還白書不次弟子徐陵和南

又

陵和南放生星聞公家極相隨喜事是拔公口具謹不多
多語惟遲拔公廷出數百里水全其命根如此功德算
數無盡隨喜無量此不委諮弟子徐陵和南

五願上智者禪師書

陵和南弟子思出樊籠無由羽化既善根微弱冀願力
莊嚴一願臨終正念成就二願不更地獄三途三願即

還人中不高不下處託生四願童真出家如法奉戒五
願不墮流俗之僧憑此誓心以策西暮今書丹款仰乞
證明陵和南

序

玉臺新詠序

凌雲槩日由余之所未窺千門萬戶張衡之所曾賦周
王璧臺之上漢帝金屋之中玉樹以珊瑚作枝珠簾以
玳瑁為柙其中有麗人焉其人也五陵豪族充選掖庭

四姓良家馳名永巷亦有潁川新市河澗觀津本號嬌
娥曾名巧笑楚王宮內無不推其細腰魏國佳人俱言
訝其纖手閱詩敦禮非直東隣之自媒婉約風流無異
西施之被教弟兄協律自小學歌少長河陽由來能舞
琵琶新曲無待石崇篴篥雜引非因曹植傳鼓瑟於楊
家得吹簫於秦女至若寵聞長樂陳后知而不平畫出
天仙闕氏覽而遙妬且如東隣巧笑來侍寢於更衣西
子微顰將橫陳於甲帳陪游馭娑騁纖腰於結風長樂

鴛鴦奏新聲於度曲，粧鳴蟬之薄鬢，照墮馬之垂鬟，反
挿金鈿，橫抽寶樹，南都石黛，最發雙蛾，北地燕脂，偏開
兩靨，亦有嶺上仙童，分丸魏帝，腰中寶鳳，授歷軒轅，金
星與婺女爭華，麝月共嫦娥競爽，驚鸞浴袖，時飄韓掾
之香，飛燕長裾，宜結陳王之佩，雖非圖畫，入甘泉而不
分，言異神仙，戲陽臺而無別，真可謂傾國傾城，無對無
雙者也。加以天精開朗，逸思彫華，妙解文章，尤工詩賦。
琉璃硯匣，終日隨身，翡翠筆林，無時離手，清文滿篋，非

惟芍藥之花新製連篇寧止蒲萄之樹九日登高時有
緣情之作萬年公主非無累德之辭其佳麗也如彼其
才情也如此既而椒房宛轉柘館陰岑絳鶴晨嚴銅螽
晝靜三星未夕不事懷衾五日猶餘誰能理曲優游少
託寂寞多閑厭長樂之疎鐘勞中宮之緩箭輕身無力
怯南陽之擣衣生長深宮笑扶風之織錦雖復投壺玉
女為歡盡於百驍爭博齊姬心賞窮於六著無怡神於
暇景惟屬意於新詩可得代彼萱蘇微蠲愁疾但往世

名篇當今巧製分諸麟閣散在鴻都不籍篇章無由披
覽於是燃脂暝寫弄墨晨書撰錄艷歌凡為十卷曾無
參於雅頌亦靡濫於風人涇渭之間若斯而已於是麗
以金箱裝之寶軸三臺妙迹龍伸蠖屈之書五色花牋
河北膠東之紙高樓紅粉仍定魯魚之文辟惡生香聊
防羽陵之蠹雲飛六甲高擅玉函鴻烈仙方長推丹枕
至如青牛帳裏餘曲既終朱鳥牕前新粧已竟方當開
茲縹帙散此緇繩永對玩於書帷長循環於織手豈如

鄧學春秋儒者之功難習竇傳黃老金丹之術不成固
勝西蜀豪家託情窮於魯殿東臺甲館流詠止於洞蕭
變彼諸姬聊同棄日猗與彤管麗矣香奩

碑

司空徐州刺史侯安都德政碑

巖巖天柱大矣周山之峰桓桓地軸壯哉崑崙之阜三
光懸而不墜九土鎮以無疆承乾合德之君則天體元
之后所以並咨四鎮咸建五臣業配蒼祇功成寓縣至

於流名雅頌著美風詩年代悠然寂寥無紀其能繼茲
歌詠者司空侯使君乎自文昭武穆祚土開家濮水盛
其衣簪榮波分其緒秩仁義之道夷門美於大梁儒雅
之風司徒重於強漢自通人許劭託命於江湖高士袁
忠寄身於交越俱違建安之難獨處衡山之陽祖天資
秀傑世載雄豪卓富擬於公侯班佃必於旌鼓父光祿
大夫邑里開通德之門州鄉無抗禮之客自茫茫禹迹
赫赫宗周家滅驪戎國亡夷羿我高祖武皇帝迎河圖

於浪泊括地象於炎洲南興涿鹿之師北問共工之罪
天生宰輔堯年致白虎之祥神賜英賢殷帝感蒼龍之
傑公亦觀時佇聖嘯咤風雲跪開黃石之書高詠玄池
之野沉吟梁甫自比管仲之才惆悵莘郊久負伊生之
歎自羯虜侵華羣蠻縱軼後皋桂部之地四戰五達之
郊郡境賢豪將謀禦難長者僉論推公主盟義士雄民
星羅霧集公既膺五聘方啟六韜率是驍徒仍開嶺嶠
自大討瀟湘同茲樊鄴下軍違命上策不宣敗我王師

受拘勅盜大陳格於文祖咸秩具神率土依風羣靈稟
朔公亦忠為令德天纂之謀吳帳斯開衛門無擁雖復
季孫還魯隨武濟河國慶民歡相儔匪若即授使持節
開府儀同三司丹陽尹昔光武不尤於馮異穆公深禮
於孟明終報王官之師遂舉咸陽之地斯乃聖主之宏
略而名臣之遠圖者焉皇帝以陶唐啟國致玉版於河
宗顓頊承家佐金天於江水經綸草昧定鼎之業居多
締構權輿斷鼉之功相半固以英聲馳於海外信義感

於寰中主器攸歸當璧斯在公於是抗表長信清宮未
央從億兆以同心引公卿而定策馳輕軒於軫轄奉侍
駕於中都七廟之基於焉永固萬邦之本由此克寧乃
復進司空公南徐州刺史於是鎮之以清靜安之以惠
和望杏敷耕瞻蒲勸穡室歌千耦家喜萬鍾陌上成陰
桑中可詠春鷓始轉必具籠筐秋蟀載吟競鳴機杼或
肅拜靈祀躬瞻舞雩去駕擁於風塵還旌阻於飄沫京
坻歲積非勞楚堰之泉倉廩年豐無用秦渠之水雖復

東過小縣夏雨逐其輕輪南渡滄江秋濤弭其張蓋固
不得同年而語矣若夫聽採民訟昏曉必通名引軒櫺
躬親辨決立受符於前案無留詣於後曹接務高城之
中非異甘棠之下欣欣美俗濟濟都塵以賈琮郭賀之
風行建武永平之化於是州民散騎常侍王瑒等拜表
宮闕請揚茲美化樹彼高碑民欲天從允影絲誥銘曰
鬱鬱三象茫茫九州綿天滲沚決地虔劉赫矣高祖爰
清國讐元勲佐命力牧風侯亦即旋歸拜家有暉官亭

蠡浦舊翅高飛電巷勅冠風行國威文身被髮作貢來
綏我皇纂武攀號東序謁渭同周迎門惟呂流矢為暴
纓槍斯舉喋喋蒼黎危危刀俎自我徂征妖氛克平爰
驅犬豕實剪長鯨北震巢浦南俘灌城青羌卷介赤狄
迴兵蹈舞難踰歌謠靡宣曰我黎庶俱祈上玄山移兩
越海變三田公為上相復倍斯年

廣州刺史歐陽顏德政碑

弱水導其洪源軒臺表其增殖懿哉少府師儲皇於二

京盛矣司徒傳儒宗於九世廣陵邕邕族擅江右渤海
赫赫名重洛陽若夫岳鎮龍蟠星懸鶉大衡山誕其高
德湘水降其清輝千仞孤標萬頃無度年當小學志冠
成童因孝為心欲仁成體屯騎府君早棄榮祿易簪之
日幾將毀終不杖之言深非通制遺賫巨萬富擬猗頓
裁變槐榆並賑宗戚南茨大麓北眺清湘得性於橘洲
之間披書於杏壇之上三冬文史五經縱橫頻致嘉招
確乎難拔既而帝啟黃樞神亡赤伏天地崩竇川冢沸

騰羣悍酋豪更為禍亂朝披羽檄夜焰燿烽浴鐵蔽於
山原擬金駭於樓堞公疲兵屢出獨據胡林勅賊重圍
尚凭書几揚灰既散駕棒將揮咸剋凶梁以保衡服常
以二主蒙塵三光掩曜出入逾於嘗膽殷憂獨其撫心
不治第宅溪符去病志梟羣醜彌同越石自禹珪既錫
堯玉已傳物變謳謠風移笙管商周之際孤竹尚其哀
歌曹劉之間蘇子猶其狂哭况番禺連帥寔謂宗枝迷
我天機自窺梁鼎以公威名本重逼統前軍乾數難違

剥象終悔高祖永言惟舊彌念竒功即訓皇家深弘朝
紀盤車才至輿櫬已焚祝史祆於夷吾壇塲延於井伯
綢繆安樂造次訐謀爰珥豐貂允光金螭但八桂之上
蠻夷不賓九疑之陽兵凶歲積以公昔在衡皋深留夙
愛仁恩可以懷猛獸威名可以懼啼兒乃授持節散騎
常侍衡州刺史裁皇帝從唐侯以盾國屈啟筮而登家
一恭寶祚開定江河三改璇衡苞羅湘峽昔中宗屈申
於處仲高祖遺恨於平城漢武承基方通沙塞晉明紹

運裁平姑孰方其盛業綽有光前踐祚之初進公位征
南將軍廣州刺史又都督東衡州二十州諸軍事宜公
乃務是民天救其分地火耕水耨彌亘原野賊盜皆偃
工賈競臻鬻米商鹽盈衢滿肆新垣既築外戶無扃脂
脯豪家鐘鼎為樂揚祛洒汗振雨流風市有千金之租
田多萬箱之詠僧釋慧羨等來朝絳闕備啟丹誠乞於
大路康莊式刊豐琰庶獎卿寶鼎復述台司之功羊叟
高碑更紀征南之德於是跪開黃素爰登紫泥鑑此誠

祈皆如所奏乃詔庸臣為其銘曰

赫赫宗陳桓桓鼎臣千乘建學五典攸因盛德斯遠公
門日新崇高惟岳貺甫生申去衡移廣遷征自鎮攸攸
銅界藐藐金鄰莫遠非督無思不賓三江靡浪五嶺奚
塵式歌式舞仁哉至仁公其饗福於萬斯春

晉陵太守王勵德政碑

若夫睢陵世傳已祥載德之華徐州先賢亦著清風之
美偉哉文獻光啟中興郭莖表其深源何籌慙其遠慶

豈惟桓氏之鳴玉張家之珥貂袁姓之朱衣揚宗之華
轂又有攸飛遮列班弓夾門濯龍俯望緹騎盈道奕世
如此何其盛哉君以藍田美玉大海明珠灼灼美其聲
芳英英照其符彩丰神雅淡識量寬和既有崔琰之鬚
眉非無鄭玄之腰帶爛爛如高巖下電騷騷若長松裏
風勢利無擾於胸襟行藏不槩於懷抱家門雍睦孝友
為風上友不諂下交不瀆脫貂救厄情靡矜宏釋馬窮
途唯濟危殆至於網羅圖籍脂粉藝文學侶挹其精微

詞宗稱其妙絕出為仁武將軍晉陵太守五雞三毘勤
卹有方問羊知馬鉤鉅兼設濟北移樹累政之所未治
汝南爭水連年之所無斷一朝明決曾不留滯四民商
販咸用殷阜銘曰

康哉實運美矣良臣渭自澧水源於洛濱公侯世及宰
輔相因曰我民秀山川降神風情穆穆考友恂恂學則
經笥文為世珍高風遠矣曠代難倫鼎鉉虛職台階未
臻安知霜霰遽天松椿碣石斯表民情既陳徒然下拜

何報陽春

丹陽上庸路碑

在天成象成池屬於五潢在地成形滄海環於四瀆國
險者固其金湯儲蓄者因於轉漕貨財為禮專俟會通
厥田為上皆資滲漉大矣哉坎德之為用也是以握圖
之主財以利民御斗之君因之顯教上哉少昊初命水
官遜矣高陽爰重冥職舜為太尉於是九澤載疏禹作
司空然後百川咸導開華山於高掌鑿靈沼於周源莫

匪神功皆由聖德我大梁之受天明命勞已濟民有道
稱皇無為曰帝若夫雲雷草創剪商黜夏之勲鑄寶鼎
於昆吾安能紀勒陳鴻鐘於豐岳豈易揄揚斯固名言
之所絕也及乎膺斯寶運大拯橫流屈至道於汾陽勞
凝神於貌射聖人作樂簫韶備以九成喆王盡禮春官
總於三代豈止金門桴竹玉尺調鐘公帶獻明堂之圖
匡衡建后土之議若斯而已乎天降丹鳥既序孝經河
出應龍乃私周易若夫固天將聖垂意藝文五色相宣

八音繁會不移漏刻纔命口占御紙風飛天章海溢皆
紫庭黃竹之詞晨露卿雲之藻漢之兩帝徒有詠歌魏
之三祖空云詩賦以為彭老之教終沒愛河儒墨之宗
方難火宅豈如五詩八會之殊文天上人中之妙典雪
山羅漢爭造論門鷲嶺名僧俱傳經藏香象之力持所
未勝秋兔之毫書而莫盡忠信為寶禳祈免於白駒明
德惟馨山川舍於駢犢至如月離金虎泥染石牛蒼蔚
朝興滂沲晚注而清蹕繞動織羅不搖高閑將臨油雲

自闢陽烏馭日寧懼虎賁之弓飛雨彌天無待期門之
蓋震維舉德非曰尚年若發居艷猶莊在漢濤如白馬
既礙廣陵之江山曰金牛孰辨梅湖之路專州典郡青
鳧赤馬之船皇子天孫鳴鳳飛龍之乘莫不欣斯利涉
玩此脩渠乍擁節而長歌乃攄金而鳴籟斯實曠世之
奇功無疆之鴻烈者也銘曰

后王降德於衆兆民高文象緯妙義幾神業冠遷夏功
踰八秦時惟大畜象及同人慧雨方雷禪枝獨春帝德

惟厚皇恩甚深觀乎禹迹見我堯心

孝義寺碑

臣聞道階八地猶見后妃願生千佛無匪賢聖汲引之
義雖同隨幾之感非一至如媯汭有禮皇源所以前興
周女斯歸陳宗所以流慶大矣神基帝系淑聖重光者
也慈訓太后德佐初九道暉上六居天上天中之極處
太任太姒之尊蘋藻之化斯深葛覃之風彌遠皇帝膺
茲上聖契彼援神受敬在乎一人德教刑乎四海是以

明星皎皎流半月之光甘露團團灑如飴之味嘉禾自
秀浪井恒清天降徵祥日聞書府自大明紹運神武應
期至道旁通無思不格戊己校尉西闕玉門伏波將軍
南表銅柱方使三千世界百億須彌同望飛輪共稟玄
德元嘉三年正月二十一日詔旨仰惟聖德方被兆民
乃勅有司改東成里為孝義里昔岱山徒號重華著其
受終德水移名秦人表其嘉運豈若盡在輿地書茲里
門仰述天經光臨父母臣陵稽首乃作銘曰

願此良因宜資貴親三乘並策四梵為賓紺殿安坐蓮
花養神燈前禮佛地後邊身並濟舍識咸歸至真國家
隆盛同享遐慶謹勒豐碑陳其舞詠

齊國宋司徒寺碑

無色之外方為化城非想之中猶稱火宅若夫衆生無
盡世界無窮芬若披蓮遠如散墨善才童子南行未窺
目連沙門北遊不見一一刹土皆由業緣萬萬僧祇終
非常樂天宮蹇產猶傾四大之風魔殿崔嵬終懼三災

之火朱樓寶塔輝煥爭華既義暢中土道流遐域顯默
同歸華夷俱慕自枕石漱流始終一槩悟智交養三十
餘年春秋八十三古人云道存人亡法師之謂凡我門
徒感風徽之緬邈傷諮悟之永滅敢以淺見揚德金石
銘曰

九流依真三乘歸佛道住絕跡慈還接物孰是發蒙昭
我慧日攝亂以定闢邪以律秦皇雄威蔽理通情王孫
徧解遠死滯生夫子之悟萬劫獨明寒暑遞易悲欣舉

壤秋蓬四轉春鴻五響孤松獨秀德音長往節有推遷
情無遺想

長干寺衆食碑

昔炎皇肇訓稷正脩官信矣民天之言誠哉國寶之義
自非道登正覺安住於大般涅槃行在真空深入於無
為般若則菩薩應化咸同色身諸佛淨土皆為搏食證
常住者爰訖乳糜補尊位者猶假香飯亦有三心未滅
七反餘生應會天宮就齋龍海況復繕居地轉成憇珠

庭固以皆種仙禾並資靈粟者矣法師常願以智慧火
燒煩惱薪普施衆生同餐甘露況復安居自恣願學高
年或次第於王城猶棲遲於貧里迦留乞麵若用神通
須提請飯致遺豪貴於是思營衆業願造坊廚庶使應
供之僧皆同自然之食升堂濟濟無勞四輩之頻高廩
我我恒有干食之備其外鐵市銅街青樓紫陌辛家黑
白之里甲第王侯之門莫不供施相高資儲轉衆法師
善巧方便溫和尚羅教授滋生隨年增長假使桑林下

雨瓠水揚波猶厭稻梁永無饑乏加以五鹽具足七采
芳軟麩類天厨果同香樹羹鼎之大殷王未逢糜餗之
溪齊都非擬昆吾在次皆鳴鷺嶺之鐘暘谷初升同洗
龍池之鉢

東陽雙林寺傳大士碑

夫至人無己屈體申教聖人無名顯用藏跡故維摩詰
降同長者之儀文殊師利或現儒生之像提河獻供之
旅王城迦衆之端抑號居士時為善宿大經所說當轉

法輪大品之言皆紹尊位斯則神通應化不可思議者

乎東陽郡烏傷縣雙林寺傳大士者即其縣人也昔巖

谿蘊德渭浦呈祥天賜殷宗誕興元相景侯佐命樊滕

是埒介子楊名甘陳為伍東京世載西晉重光惟是良

家降神攸託若如本生本行或示緣起子長子雲自叙

元系則云補處菩薩仰嗣釋迦法王真子是號彌勒雖

三會濟濟華林之道未乎千尺巖巖穰佉之化猶遠但

分身世界濟度羣生機有殊源應無恒質自敘因緣大

宗如此按停水經云觀世音菩薩有五百身在此閻浮
提地亦同凡品教化衆生彌勒菩薩亦有五百身在閻
浮提種種示現利益衆生故其本迹難得而詳言者也
爾其蒸蒸大孝肅肅惟恭厥行以禮教為宗其言以忠
信為本加以風神爽朗氣調清高流化親朋善和紛諍
豈惟更盈毀壁宜僚下丸而已哉至於王戎吏部鄧禹
司徒同此時年有懷棲遁仍隱居松山雙林寺棄捨恩
愛非梁鴻之並遊拜辭親老如蘇耽之永別自脩禪遠

壑絕粒長齋非服流霞若餐朝沆太守王恁言其詭詐
乃使邦佐幽諸後曹迄至兼旬曾無假食於是州鄉媿
伏遠邇歸依迹迹山林肆行蘭若又自叙云七佛如來
十方並現釋尊摩頂願受深法每至楫槌應叩法鼓裁
鳴空界神仙共來行道其外人所見者拳握之內或吐
異香胸臆之間乍表金色時有信安縣比丘僧朔與其
同類遠來觀化未及祇肅忽見大士身長丈餘朔等驚
慚相趨禮拜虔恭既畢更覩常形又有比丘智懿優婆

夷錢滿願等伏膺累載頻覩異儀或見脚長二尺指長
五寸餘兩眼光明雙瞳照耀皆為金色並若金錢譬李
老而相伴同周文而等狀姜嫄所履天步可以為儔河
流大庾神足宜其相比支郎之彥既恥黃精瞿曇之師
有慚青目既而四空妙定薰脩已成入解明心莊嚴斯
滿時還鄉黨化度鄉親俱識還源並知迴向或立捨鬚
髮如聞善來大傾財寶同脩淨福大士薰禪所憩獨在
高巖爰挺嘉木是名禱樹擢本相對似雙槐於俠門合

幹成陰類雙桐於空井厥體貞勁無爽大年置霜停雪
寒暑恣翠信可以方諸堅固譬彼娑羅既見守於神龍
將為疑於變鶴乃於山根嶺下創造伽藍因此高柯故
名雙林寺矣大士亦還其里舍貨買妻兒營締支提繕
寫尊法膏以聚沙畫地皆成圖果芥子菴羅無疑徧陋
乃起九層塼塔形相巋然六時虔拜巡繞斯託又以大
乘方等靈藥寶珠眷言山谷希得傳寫龍鄉思其曉照
象駕乏其流通復造五時經典千有餘卷與夫鬻子而

葬同其至誠嫁妻而隱無殊高節若寄搏麩如因賣花
共指菩提方成親眷至如一相無相之懷虛己虚心之
德化雞在臂方推理於自然毒蛇傷體終無擾於溪定
門徒肅肅學侶誦誦通被慈悲義無偏黨大通元年
縣中長宿傅普通等一百人詣縣令范胥連名薦述又
以中大通四年縣中豪傑傅德宣等道俗三百人詣縣
令蕭詡具陳德業夫以連城之寶照廡之珍野老怪而
相捐工人迷而不識胥等體有流俗才無鑒真亟欲騰

開終成虧怠梁高祖武皇帝紹隆三寶弘濟四生迹冠
優填神高仙豫夫以陳蕃靜室猶懷天下之心伊尹躬
耕思弘聖王之道況我有慧日明炬如風寶車濟是沉
舟能升彼岸固宜光宣正法影響人王者乎於是以中
大通六年正月二十八日遣弟子傅暉出都致書高祖
其辭曰雙林樹下當來解脫善慧大士白國主救世菩
薩今條上中下善希能受持其上善以虛懷為本不着
為宗妄想為因涅槃為果其中善以治身為公治國為

宗天上人間果報安樂其下善以護養衆生勝殘去殺
普令百姓俱稟六齋夫以四海之君萬邦之主預居王
土莫不祇肅爾時國師智者法師與名德諸衆僧等言
辭謹敬多乖釋迦之書文牒畢恭翻豫山公之啟大士
年非長老位匪沙門通疏乘輿過無虔恪京都道俗莫
不嗟疑睽至都投太樂令何昌并有弘誓誓在御路燒
其左手以此因緣希當聞達昌以此書呈同泰寺僧皓
法師師衆所知識名稱普聞見書隨喜勸以呈奏皇心

懽悅遽遣招迎來謁宸闈亟論經典同泰寺前臨北闕
密邇南宮仍請安居備諸資給後徙居鍾山之下定林
寺遊巖倚樹宴坐經行京洛名僧學徒雲聚莫不提函
負裘問慧諮禪居蔭高松卧依盤石於是四徹之中恒
泣甘露六旬之內常雨天酒豈非神仙影響示現禎祥
者乎帝於華林園重雲殿自開講三慧般若經窮須臾
之所問御法勝之高堂百千龍像圍繞餐聽黑貂朱紱
王侯滿筵國華民秀公卿連席乃令大士獨榻對揚天

宸并遣傳詔及宣傳左右四人接受言論爾時納揆之於臺內司隸之在殿中杜預還朝馬防親貴舊儀懸席皆等庶僚以大士絕世通人故加其殊禮矣及玉輦升殿雲蹕在堦晏然箕坐曾不山立憲司譏問愈見凝跼但答云法地若動則一切法不安應對言語皆為夔異昔漢皇受道藥大不臣魏祖優賢楊曼如客河上之老輕舉臨於孝文嚴子之高閑卧加於光武方其古烈信可為儔帝又於壽光殿獨延大士講論玄蹟言無重頌

句備伽陀音會宮商義兼華藻豈惟實積獻蓋文成七

言釋子彈琴歌為千偈而已固非論經於白虎之殿應

詔於金馬之門說義雲臺受釐宣室可同年而語哉自

火運將終民無先覺雖復五湖內鼎蒼鷲之兆未萌四

海橫流夷羊之拔匪現大士天眼所照預覩未來摩掌

之明夙鑒時禍哀羣生之版蕩泣世道之崩淪救苦為

懷大悲為病誓欲虛中閉氣識食為齋非服名香但資

禪悅方乃燒其苦器製造華燈願以此一光明遍照十

方佛土勸請調御常住世間救現在之兵災除當來之
苦集於是學衆悲號山門踊叫弟子居士徐普拔潘普
成等九人求輸己命願代宗師其中或馘耳而刊鼻或
焚臂而燒手善財童子重觀知識忍辱僊人是馮相輩
大士乃延其教化更住閻浮弘訓門人備行衆善於是
弟子居士范難陀弟子比丘法曠弟子優婆夷嚴比丘
各在山林燒身現滅次有比丘寶月等二人窮身繫索
挂錠為燈次有比丘慧海菩提等八人燒指供養次有

比丘尼曇展慧光法織等四十九人行不食齋法次有
比丘僧拔慧品等六十二人割耳出血用和名香奉依
師教並載在碑陰書其名品夫二儀大德所貴曰生六
趣舍靈所重唯命雖復夢幻影響同歸磨滅愛使迷情
唯貪長久自非善巧方便漚和舍羅照以慈燈沾其妙
藥豈或捨不貴之軀而能行希有之事若令割身奉鬼
聞半偈於涅槃賣髓祠夫能供養於般若理當剗心靡
吝擢骨無疑者乎大士小學之年不遊黌舍大成之德

自通墳典安禪合掌說偈論經滴海未盡其書懸河不窮其義前後講維摩思益經等比丘智瓚傳習受持所應度者化緣既畢以大建元年朱明始獻奄然右卧將歸大空二旬初滿三心是滅爾時隆暑便已赫曦屈伸如常溫暖無異洗浴究竟扶坐着衣色貌敷渝光彩鮮潔爰經信次宛若平生烏傷縣令陳鍾者即往臨赴猶復反手傳香皆如疇昔若此神變無聞前古雖復青牛道士白馬先生便遁形骸本慚希企若其滅定無想彈

指而石壁已開法王在殯申足而金棺猶啟非斯矣莫
與為儔遺誠於雙林山頂如法燒身一分舍利起塔於
冢一分舍利起塔在山又造彌勒像二軀置此雙塔莫
移我眠牀當取法猛上人織成彌勒像永安牀上寄此
尊儀以標形相也於是門徒巨痛遂爽遺言用震旦之
常儀乖闕維之舊法四部皆集悲同白車七衆攀號哀
踰青樹弟子比丘法璿菩提智瓚等以為伯陽之德貞
桓紀於賴鄉仲尼之道高碑書於魯縣亦有揚雄弟子

鄭玄門人俱述清猷載刊玄石於是祈聞兩觀冒涉三
江爰降絲綸充成豐琰陵雖不敏夙仰高風輕課庸音
乃為銘曰

大矣權迹勞哉赴時或現商主聊為國師卑同巧匠屈
示良醫猗歟開士類此難思當來解脫克紹迦維妙道
猶秘機緣未適弗降雞頭寧開狼迹北地爰徙東山攸
宅族貴泥陽宗分蘭石莫測其本徒觀其迹邈有蒲塞
心冥世雄明宣苦苦妙鑒空空汲引三界行藏六通爰

初隱逸晏處林叢食等餐露齋疑服風敬禮珍塔歸依
靈像未若天尊躬臨方丈慧炬常照慈燈斯朗釋梵天
仙晨昏來往濟濟行法洗洗談講德秀臧丈風高廣成
來儀上國抗禮承明妙辯無相深言不生撞鐘比說擊
鼓慚英樂論天口誰其與京乍現僊掌爰標神足色艷
沉檀香踰蒼蔔我有邊際隨機延促誓毀身城當開心
獄忽示泡影俄如風燭噉噉門人承師若親寧焚軟疊
弗燎香薪合窟為窆方墳以埋須彌巨海變仄揚塵淨

土無壤靈儀自真何時湧塔復覩全身

天台山徐則法師碑

夫海水揚塵幾千年而可見天衣拂石幾萬歲而應平
至人者譬彼晨昏方乎晷刻固非俗士之所能言寰中
之所能量者也至如不死之草猶稱南喬長生之樹尚
挺西崑百紀遊龜皆登蓮葉千齡壽鶴或舞松枝假矣
生民何其天脆譬彼風電同諸泡沫琢火之歎聞諸往
賢逝水之悲嗟乎前聖樵人看博信未始乎淹留仙客

彈琴固不移於俄頃然而子孫皆其數世鄉黨咸為草
萊是以志士名賢飄然長驚臊羶榮利厭穢風塵服冕
乘軒其猶桎梏朱庭紫閣事甚籠樊隱淪巖洞餐餌芝
髓忽矣身輕俄然羽化金繩玉版受謁帝之符龍駕霓
裳處仙宮之錄法師蕭然道氣卓矣仙才千仞孤標萬
頃無度所以伊川控鶴葉縣乘鳧靈化無方去還斯在
銘曰

來去三鳥賓遊二童然香雨上擊磬雲中玉粒雖軟金

膏未鎔方流道業濟彼昏蒙

頌

皇太子臨辟雍頌

有序

臣聞天大王大詳於道德之言天文人文顯於爻象之說
是以大君革命黔首所以庇焉聖人創物文籍所以生焉
咸由此道制為民極莫不對越上靈裁成庶類濟世育德
昭彼昆蟲皇帝世膺下武體資上德握天鏡而授河圖執
玉衡而運乾象皇太子耀彼重離光茲匕鬯儀天以行三

善儷極以照四方惟忠惟孝自家刑國乃武乃文化成天下侍中國子祭酒新安王宗室羽儀衣冠準的惟善為樂造次必儒奧以十一年三月二十一日受詔弘宣發論語題攝齊升堂摠衣即席對揚天人開闢大訓清言既吐精義入神副德爰動音辭鋒起問難泉涌辨紛綸之異定倫理之疑玉振鏘鏘雲浮雨布介王奉繫聖蹤馳辨秀出信令張禹慚其師法何晏忸其訓詁穆穆焉洋洋焉此實虞朝之盛德生民之壯觀也臣抑又聞之魯頌聿興史克宣

其懿晉雍大啟王廡逞其詞所以述休平之風揚君上
之德輕以下才敢為頌曰

皇運勃啟膺圖受命紫蓋東臨黃旗南映積仁累德重
明疊聖四海無浪三階已平儲駕戾止和鸞有聲弘風
講肆崇儒肅成丹書貴道黃金賤籛洙泗興業闕里增
榮

銘

太極殿銘 有序

夫紫蓋黃旗揚都之王氣長久虎踞龍蟠金陵之地體
貞固天居爽塏大寢尊嚴高應端門仰模營室歸於有
德譬彼河圖傳我休明義同商鼎太極殿者法互象冗
王者之位以尊左平右城天子之堂為貴往朝煨燼多
歷年所世道隆平宜其休復監軍鄒子度啟稱即日忽
有一大梓柱從流來泊在後渚岸嵯峨容與若漢水之
僊槎搖漾波濤似新亭之龍刹孤拔靈山允彰天貺昔
梁氏承聖將圖繕修東虜窺江西胡犯畢定之方中五

興師旅揆之以日輒有灾故是知秦人所止實漢祖而
為宮吳都佳氣乃元皇而斯宅千楹赫奕萬拱峻層植
綠芰而動微風舒丹蓮而制流火甘泉遠望觀正殿之
崢嶸函谷遙看美皇居之佳麗信可以齊三光而示宇
宙會萬國而朝諸侯爰命微臣乃為銘曰

雍時相望參差未央偃師迴顧崔嵬德陽高捫太乙正
睹瑤光峨峨靈柱赫赫流樟美矣宮室嘉哉今日御宸
垂旒當朝靖蹕樂備韶夏禮兼文質帝旅無諠王旗斯

謚肅肅卿士邕邕承弼漢座雕屏周人檻櫺城隅有勒
殿省皆銘況復皇寢宜昭國經方流典訓永樹天廷

報德寺刹下銘

有序

昔者明王大考感動神祇助月致景星之祥非煙流慶
雲之色然而嚴敬之道惟事盡於配天明發之懷誠不
過於饗帝豈如以梵宮之樂資乎廟堂淨土之因歸於
園寢雖復青雲譙郡之境碧泉春陵之鄉上幼懷凝重
未曾遊陟年將志學即事登庸宣力淮潯屬有嘉夢其

夢也畢陌弘敞橋山屈盤氣象靈長風煙騰薄使隊雙
表其高百尋左則青龍蟠蜿右則白虎蹲踞軒轅之駕
譬婉婉而多慙吳王之墳狀耿耿而非擬有人指其地
云此是國陵自爾迄永定初其間二十有餘年至歲紀
頻移崇塋乃作觀其山川形勢王相徵圖瞻拜高巖宛
如前夢大矣哉孝悌之至通於神明者與銘曰

壯矣金表傍依堦垣高連綵霓極睇翔鸞梵偈宵唱雲
花晝翻三心斷縛六道除怨趙夢天樂秦遊帝閭王靈

在上巨勝奚論福彼羣品俱排大昏皇家七百於萬維
孫

後堂望美人山銘

一作庾信
今兩存之

高堂凝雨洛浦無洲何處相望山邊一樓峰因五婦石
是三侯險逾地肺危鄰天柱禁苑斜通春人恒聚樹裏
聞歌枝中見舞恰對粧臺諸牕併開遙看已識試喚便
迴豈如織女非秋不來

麈尾銘

爰有妙物窮茲巧制員上天形平下地勢靡靡絲垂綿
綿縷細入貢宜吳出先陪楚壁懸石拜帳中玉舉既落
天花亦通神語用動捨黠出處隨時揚斯雅論釋此繁
疑拂靜塵暑引飾妙詞誰云質賤左右宜之

哀策文

陳文帝哀策文

維太康元年太歲丙戌四月丁未朔二十七日癸酉大
行皇帝崩於有覺殿殯於太極之西階粵六月丙寅將

遷於永寧陵禮也客車晚駕幄殿晨張旌帷具列綵翻
成行哀子嗣皇帝諱擗蜃輅於丹陛攀龍帷於紫庭趨
過窮於屏闈拜慟感於明靈東京飛其瑞露北陸實其
祥星乃詔雲臺之史稽採咸池之曲叶大雅於鳴金同
藏書於羣玉其辭曰

若水傳帝薰風御民重光所集世載於陳赫矣高祖悠
哉上旻蟬聯寶胄暉煥郊裡我皇誕聖膺此家慶道主
衢樽神凝懸鏡洛書天表河紀靈命納揆馳芳賓門流

詠稽陰克伐震野勤王毫道增構幽風會昌言瞻少昊
實仗高陽駕彼軫轡清宮未央歡覃兆庶德洎遐荒穆
齊高寢上膳長樂肅肅承顏哀哀薦酌悼園恭儉章陵
謙約大寶崇名無間改作纂武升歷遺愛寔繁三湘九
派沴氣雲昏力折天柱才傾地門甘泉夜照細柳朝屯
谷魁山鬼橫流塞源赫赫英薨赳赳雄斷遍行天討無
遺神算鬱掃江淮長驅巴漢九夷百越雷隨風渙北俘
昆耶西戡伊軒荷負皇極劬勞庶幾勤民聽政盱食宵

衣服貴綈阜風移閭闔唐山罷奏濮水韜徽訪採狂狷
搜馭仄微世感中孚民維大畜外戶無閉高垣奚築降
情儒雅凝懷庠塾御廡為歡臨雍彌肅禮兼三代樂備
九成天資武德地照文明墨履斯在幪巾自清連珠合
璧曜爽流精獸無時豫禽歌頌平帝載維遠王靈維大
候雨占風荒中海外憬彼鞮譯咸承冠帶是日君臨斯
為交泰白環已賁玄珪克禎東河佇揖北狄思征鉞斧
將戒璵珞未鳴星淫去楚日沴悲荆億兆何憂穹旻遽

傾大禹胼胝重華胥腊仰惟勞務同斯違懌發夢無徵
昭祈奚益聽茂陵之鐘鼓抱喬陽之劍烏詎髣髴於宸
儀終纏綿於號擗嗚呼哀哉三占以吉四海同奔列眉
天宇崩號帝閭千門啟於閭闔萬乘警於靈輜槐風悲
於輦道松雨思於郊原鑿旂動而虛蹕宿衛靜而空尊
嗚呼哀哉卑陌平夷流山蟠固紀無遷市唐有通樹經
白社之修塗迴青門之廣路思沛邑以東臨懷周京以
西顧嗚呼哀哉機神不測性道難稱充窮靡寄孺慕奚

馮惟封云之與禪肅遺玉牒之與金繩揚英聲而永久
共日月而俱升嗚呼哀哉

墓誌

司空章昭遠墓誌

周原膺膺佳氣蔥蔥王業攸興帝圖斯盛在昔光武佐
命鄰縣者鄧侯高祖元臣同郡者蕭相公台輔之量便
著綺紈瑚璉之姿無待雕琢起家為東宮直前所奉之
君則梁簡文皇帝既而黑山巨盜憑陵上國白水強胡

虔劉中夏公傾其產業募是驍雄思報皇儲累殲鯨寇
屬幽風有象代邸方隆搜荆楚之英才資班輸之妙略
百樓忽起登雲霄而俯臨萬弩俱張隨雷霆而並震揚
兵於九天之上決勝於千里之中殪彼羣兇皆無旋踵
陳寶應志懷反叛客引周迪資其食力更事窺窬公奉
詔崇朝飲冰將力前茅後勁步驟奔馳仍同甌閩殄其
巢窟若夫鳴虵之洞深谷隱於蒼天飛猿之嶺喬樹參
於雲日宜越艇而登嶠蒙燕犀而涉江威武紛紛震山

風海於是咸俘偽帥悉據高墉爰洎滄溟莫不懲艾既
而齊人無信將謀郢藩鬪艦戈船窺江淹漢公纔聞羽
檄遽稟師期馳襲荊郢應時燒蕩方欲宣威隴汧大討
梁華屬上將之韜光遲中台之掩曜大建三年薨於軍
幕爾乃青鳥相墓白鵲標墳林有逃車樹同華蓋前旌
熊軾後乘龍輜介士發三河之民哀鏡同駟馬之曲長
安傳坐恩禮盛於西京襄陽墮淚悲慟喧於南北

河東康簡王墓誌

夫聖人至德天道福謙大哉堯舜貽慶長遠明兩之盛
中陽纂於夔龍百世之祝皇家兆於鳴鳳違青丘於海
北應紫蓋於江南帝系王基重光累葉高祖之建天柱
列聖之補地維蕩蕩乎民無得而名焉者也王資神昂
緯託曜房靈體斯孝烈不由師保月生之對何用於擬
議日近之言無階於等級封河東王加侍中淑貌與金
燧相宜清顏與玉壺同照授使持節南徐州刺史武羌
旅拒亭障遷移漠草非長廣之東湖萊近荆門之北王

常譏庾翼使白面之非才深慕曹彰歎黃鬚之為可火
精不退奚應善言水煙難消徒持陰德薨於沙鎮時年
一十有七追贈司空加鼓吹班劍謚曰康簡王洛北占
墳河南除道葭悲煙殿之聲劍動豐城之氣豈惟晉皇
寵悼重琅邪之贈官魏后高文制蒼舒之哀誄

裴使君墓誌

君五音之候兼其方牧八陣之圖窮其巧變用能戰必
勝攻必取督稱無難兵號解煩朝飛火箭夜聳雲梯燧

象從奔聯狼已合於是厥顏不撓極咄諸戎龐德高聲
肆言羣逆胡夷總至猶持子路之纓鋒刃相交終荷溫
生之節每以財輕篋籜義重嵩衡割宅宇貧友之孤開
門延故人之殯篤好朋遊居常滿席每至鮮雲藹藹披
王安之衣明月團團似班姬之扇日帶花以如笑風鳴
條而若歌傍列絲桐對揚文酒一石之後逾能斷獄五
斗之量猶未解醒嗟乎潘岳之詩致哀周密莊公之誄
用愍相遺

文

為陳武帝即位告天文

皇帝臣諱敢用元牡昭告於皇皇后帝梁氏以圯剝薦
臻歷運有極欽若天應以命於諱夫肇有烝民乃樹司
牧選賢與能未常厥姓放勛重華之世咸無意於受終
當塗典午之君雖有心於揖讓皆以英才處萬乘高勲
御四海故能大庇黔首光宅區縣有梁末運仍葉邁屯
孺醜憑陵久移神器承聖在外非能祀夏天未悔禍復

罹寇逆嫡嗣廢黜宗枝僭詐天地蕩覆紀綱泯絕諱爰
初投袂大拯橫流重舉義兵實戡多難廢王立帝實有
厥功安國定社用盡其力是謂小康方期大道既而煙
雲表色日月呈瑞緯聚東井龍見譙邦除舊布新既彰
玄象遷虞事夏且協謳訟九域八荒同布衷歎百神羣
祀皆有誠願梁帝高謝萬邦授以大寶諱自惟菲薄讓
德不嗣至於再三辭勿獲許僉以百姓須主萬機難曠
皇靈眷命非可謙拒畏天之威用膺嘉祚永言夙志能

無慙德敬簡元辰升壇受禪告類上帝用答民心永保
於我有陳惟明靈是饗

樂府

驄馬驅

以下
五言

白馬號龍駒彫鞍名鏤渠

一作
衛

諸兄二千石小婦字羅

敷倚端輕掃史

一作
吏

召募擊休屠塞外多風雪城中絕

詔書空憶長楸下連蹠復連跣

中婦織流黃

落花還

一作飛

井上春機當戶前帶衫行幃口覓釧枕檀

一作入壇邊數鑷經無亂新漿緯易牽蜘蛛夜伴織百舌曉

驚眠封用黎陽土書因計吏船欲知夫壻處今督水衡

錢

出自薊北門行

薊北聊長望黃昏心獨愁燕山對古刹代郡隱

一作倚

城

樓屢戰橋恒斷長冰墜不流天雲如地陣漢月帶胡秋
漬土泥函谷接繩縛涼州平生燕頷相會自得封侯

隴頭水

別塗聳千仞離川懸百丈攢荆夏不通積雪冬難上枝
交隴底暗石礙波前響迴首咸陽中唯言夢時往

折楊柳

嫋嫋河堤樹依依魏主營江陵有舊曲洛下作新聲妾
對長楊苑君登高柳城春還應共見蕩子太無情

關山月二首

關山三五月客子憶秦川思婦高樓上當牕應未眠星

旗映疎勒雲陣上祁連戰氣今如此從軍復幾年
月出柳城東微雲掩復通蒼茫縈白暈蕭瑟帶長風羌
兵燒上郡胡騎獵雲中將軍擁節起戰士夜鳴弓

洛陽道二首

綠柳三春暗紅塵百戲多東門向金馬南陌接銅駝華
軒翼葆吹飛蓋響鳴珂潘郎車欲滿無奈擲花何
洛陽馳道上春日起塵埃濯龍望如霧河橋渡似雷聞
珂知馬蹠傍憶見甕開相看不得語密意眼中來

長安道

輦道乘雙闕，豪雄被五都。
橫橋象天漢，法駕應坤圖。
韓康賣良藥，董偃嚮明珠。
喧喧擁車騎，非但執金吾。

梅花落

對戶一株梅，新花落故栽。
燕拾還蓮井，風吹上鏡臺。
娼

家怨一作愁思妾樓上獨，
裒徊啼看竹葉錦簪一作簪罷未

能裁

紫駟馬

玉璫繡纏髻金鞍錦覆幪風驚塵未起草淺埒猶空角
弓連一作穿兩兔珠彈落雙鴻日斜馳逐罷連翩還上東

劉生

劉生殊倜儻任俠遍京華戚里驚鳴筑平陽吹怨笳俗
儒排左氏新室忌漢家高才被擯壓自古共憐嗟

烏棲曲二首 七言

卓女紅妝期此夜胡姬沽酒誰論價風流荀令好兒郎
偏能傅粉復薰香

繡帳羅帷隱燈燭一夜千年猶不足唯憎無賴汝南雞
天河未落猶爭啼

禠曲

傾城得意已無儔洞房連閣未消愁宮中本造鴛鴦殿
為誰新起鳳凰樓綠黛紅顏兩相發千嬌百念情無歇
舞衫迴袖勝春風歌扇當腮似秋月碧玉宮妓自翩妍
絳樹新聲最可憐張星舊在天河上從來張姓本連天
二八年時不憂度旁邊得寵誰相妬立春歷日自當新

正月春幡底須故流蘇錦帳挂香囊織成羅幌隱燈光
只應私將琥珀枕暝暝來上珊瑚牀

長相思二首

長相思望歸難傳聞奏詔戍皋蘭龍城遠鴈門寒愁來
瘦轉劇衣帶自然寬念君今不見誰為抱腰看

長相思好春節夢裏恒啼悲不洩帳中起牕前髻柳絮
飛還聚遊絲斷復結欲見洛陽花如君隴頭雪

詩

同江詹事登宮城南樓

以下
五言

元良屬上德率土被中孚漢幄朝無怠周門夕復趨桓
經既受業賀拜且尊儒壯志諧風雅高文會斗樞鏗鏘
叶舞蹈照爛等琨瑜溝水慙雄伯漳川仰大巫鮑魚寧
入俎鈞鯨匪充厨叔譽恒詞屈防年豈濫誅

走筆戲書應令

此日乍殷勤相嫌不如春今宵花燭淚非是夜迎人舞
席秋來卷歌筵無數塵曾經新代故那惡故迎新片月

窺花簞輕寒入錦中秋來應瘦盡偏自著腰身

春情

風光今日動雪色故年殘薄夜迎新節當壚却晚寒奇

一作
故香分細霧

篆一作

石炭擣輕紈竹葉裁衣帶梅花奠

酒盤年芳袖裏出春色黛中安欲知迷下蔡先將過上

蘭

奉和詠舞

十五屬平陽因來入建章主家能教舞城中巧畫粧低

鬟向綺席舉袖拂花黃燭送空迴

一作
牕邊

影衫傳篋裏香

當繇好留客故作舞衣長

和簡文帝賽漢高帝廟

聲偶作徐摛詩彙
作庾肩吾並誤

山宮類牛首漢寢若龍川玉盃無秋耐金燈滅夜煙丹
帷迫靈嶽紺席下羣僊堂虛沛筑響釵低戚舞妍何殊
后廟裏子建作華篇

山齋

桃源驚往客鶴嶠斷來賓復有風雲處蕭條無俗人山

寒微有雪石路本無塵竹徑蒙籠巧茅齋結構新燒香
披道記懸鏡厭山神砌水何年溜簷桐幾度春雲霞一
已絕寧辨漢將秦

詠柑

藝文初學並作徐陵乃劉孝綽舊集載此或誤收也

朱實挺江南苞品擅珍淑上林雜嘉樹江潭間修竹萬
室擬封侯千株挺荆國綠葉萋以布素榮芬且郁得陳
終宴歡良垂雲雨育

侍宴

園林才有熱夏淺更勝春嫩竹猶含粉初荷未聚塵承
恩預下席應阮獨何人

奉和山池

羅浮無定所鬱島屢遷移不覺因風雨何時入後池樓
臺非一勢臨翫自多奇雲生對戶石猿挂入欄枝

山池應令

畫舸圖僊獸飛艍挂采旂榜人事金漿釣女飾銀鈎細
萍時帶檝低荷乍入舟猿啼知谷晚蟬咽覺山秋

別毛永嘉

英華作別
毛尚書

願子厲風規歸來振羽儀
嗟余今老病此別空長離
白馬君來哭黃泉我詎知
徒勞脫寶劍空掛隴頭枝

秋日別庾正員

藝文作
張正見

征途愁轉旆連騎慘停鑣
朔氣凌疎木江風送上潮
青雀離帆遠朱鷺別路遙
唯有當秋月夜夜上河橋

新亭送別應令

鳳吹臨伊水時駕出河梁
野燎村田黑江秋岸荻黃
隔

城聞上鼓迴舟隱去檣神襟愛

一作憂

遠別流睇極清漳

和王舍人送客未還閨中有望

倡人歌吹罷對鏡覽紅顏拭粉留花稱除釵作小鬟綺
燈停不滅高扉掩未關良人在何處光唯見月還

為羊兗州家人答餉鏡

信來贈寶鏡亭亭似團月鏡久自踰明人久情愈歇取
鏡掛空臺于今莫復開不見孤鸞鳥香魂何處來

詠織婦

織織運玉指脈脈正蛾眉振躡開交縷停梭續斷絲簷
前初月照洞戶朱帷垂一作未垂帷弄機行掩淚彌令織素
遲

內園納涼

昔有北山北今余一作來東海東納涼高樹下直坐落花

中狹徑長無跡茅齋本自空提琴就竹籊酌酒勸梧桐

鬪鷄

季子聊為戲陳王欲騁才花冠已衝力芥爪復驚媒鬪

鳳羞衣錦雙鸞耻鏡臺陳倉若有信為覓寶鷄來

詠日華

朝暉爛曲池夕照滿西陂復有當晝景江上鑠光儀時
從高浪歇乍逐細波移一在雕梁上詎比扶桑枝

詠雪

瓊林玄圃葉桂樹日南華豈若天庭瑞輕雲帶風斜三
農喜盈尺六出儻崇花明朝闕門外應見海神車

春日

岸煙起暮色岸水帶斜暉
逕狹橫枝度簾搖驚燕飛
落花承步履流澗寫行衣
何殊九枝葢薄暮洞庭歸

春和簡文帝山齋

架嶺承金闕飛橋對石梁
竹密山齋冷荷開水殿香
山花臨舞席冰影照歌牀

闕

漢魏六朝百三家集卷一百三下



總校官庶吉士 臣侍 朝

校對官中書 臣張 頊

謄錄監生 臣張曾溶